

Txirritola

ARAMAIO / Barikua / 2003ko irailaren 26a / 78. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Basurdeek kalteak eragin dituzte Bolintxoko zelaietan

UBANE MADERA

Aurtengo sikateak eraginda, basurdeak jaitsi dira basotik Bolintxoko pare bat zelaitara. Batean lurra harrotu dute eta bestean landutakoa apurtu edo jan egin dute.

Basoak siku daudela-eta, sei basurde (emea eta bost kume) Bolintxoko zelaietara jaisten dabilta azken asteotan, janari bila. Hain justu, Julian Untzuetaren eta Martin Etxaberen zelaietan igartzen dira haien arrastak. Eta ez txikiak, gainera. Juliani ganaduarendako prestatutako zelai guztia harrotu diote. Eta Martini, baba landareak lekutik atera dizkiote eta artoa jan diote. Zelaiak ureztatu egin dituztela-eta, itxura denez errazagoa zaie basurdeei janaria bilatzea.

Julianek eta Martinek kontatu digutenez, ia egunero jaisten dira basurdeak. Julian Untzuetaren zelaietan dauden behien marrumen bitartez jakiten dute etorri direla. Zelaiak inguratzen dituen hesiaren azpitik sartzen ei dira.

ZELAN KONPONDU

Hala, bada, Salesan eta Zubialde baserrien zelaietan triskantza dezente eragiten dabilta. Eta kal-



Argazkian Martin Etxaberen zelaiko artoa ikusten da, janda eta zapalduta.

te-ordainak emango dizkiete bi baserritarroi. Hain justu ere, Oilogor ehiztari elkarteak hartuko ditu bere gain kalteok. Elkarteko presidente Eduardo Fernandezek kontatu digunez, Oilogor elkar-tearen eskuetan dago basurdeak dauden basoko ehiza-babeslekua.

Ondorioz, elkarte horri dagokio kalteak ordaintzea. Gaineratutakoaren arabera, kaltetutakoekin harremanetan jarri dira, eta orain, aditu batek basurdeek eragindako kalteak peritatzeko zain daude, horren arabera kalte ordainak emateko.



Seinalea leku desegokian

Herritar batek leku desegokian dagoen seinale baten berri eman digu. Kontua da argazkian ikusten duzuen seinaleak eta errepideko markak agintzen duen lekuan STOPa eginez gero, ez dela ganoraz ikusten errepidean gora edo behera ibilgailurik badatorren. Hala, ibilgailua dezente aurreratu beharra dago errepidea garbi dagoen ikusteko; eta hori egitea arriskutsua da, parean beste ibilgailu bat agertuz gero istripua izan daiteke-eta. Are gehiago, behin baino gehiagotan gertatu da halakorik leku horretan. /U.M.

HERRITARRENHITZA/ Arantza Ibabe • Langilea

Etxebizitzaz eta beste piztia batzuez

Gaurko artikulua hau idazteko esan zidanean TXIRRITOLAKO ardura-dunak, ez neukala gairik burrunbaka barruan esan eta ideiarene bat edo beste emateko eskatu nion. Baliteke, lehengo astean hemen Manexek esan zuen legez, lokartzen hasia egotea...

Gauzak horrela, ideia guztien artean, etxebizitzena izan zen gehien gustatu zitzaidana. Bai, izan ere, astakeria larregi entzuten ez ote gabiltzan pentsatzen hasia naiz. Bai, nire generaziokook eta baita aurrekoak eta ondorengoak ere, komodoegiak garelako eta eroso bizi

garelako ez ei gara independizatzen. Nik, ez diot arrazoirik ez dutenik. Denetarik egongo da. Baina horrek arazoa tapatu besterik ez du egiten. Etxebizitzaren prezioa beldurgarria da eta inork ez du ezer egiten.

Gaur egun etxebizitza bat erosteak bizitza osoa hipotekatzea esan gura du. Gehiengoak egiten du. Horren kontura gutxiengo bat hor dabil aberatsa baino aberatsagoa egiten. Sikiera



"Etxebizitzaren prezioa beldurgarria da"

Hauk ote dira Manexek bere artikuluan zioen sehaska kulunkatzen duten batzuk? Besteen bizitza maneatzea gustuko dutenen horientzat

zoriontsuak izango balira...baina ez, urrezko grifoak eta sekulako autotzarrrak edukitzearen ez dira inor baino zoriontsuago. Haatik, hori guztia eta aberaskeria, bai aberaskeria eta ez aberastasun, gehiago izateagatik gehiengoaren bizitza hipotekatzen dute.

Mario Benedetik dio, bakar-daderik ikaragarriena pairatzen dutela: euren burua ere ez dutenen bakardadea.

Manexen artikuluari irtenbide bat eman guran eta idazleekin jarraituz, Jorge Bucay-ren liburu batzuen azalean zera jartzen du: "ipuinek umeak lokartzeko eta nagusiak itzartzeko balio dute". Beraz, ipuin dezente leitu beharrean gaudelakoan nago.

Bitartean etxebizitza erosi dutenek etxe bizitza egiten.

Barkatu Manex baina ez nengoen batere inspiratuta. Aitzakia ederra zure artikulua espazio hau betetzeko...

LABUR

Untzillako jaiak datorren asteburuan

Datorren barikuan, zapatuan eta domekan Untzillak jaiak ospatuko ditu. Barikuan, 19:00etan hasiko dira jaiak; 21:00etan, elkarteko bazkideek eta auzokideek afaria egingo dute. Zapatuan, 12:00etan auzoko hildakoen aldeko meza egingo dute, eta ostean, Aierbe abizpen trikiti saioa izango da. 17:30erako ume jolasak antolatuko dituzte; 22:30ean dantzaldia eta 23:00etan Bolo Txapelketa. Bukatzeko, domekan, 12:00etan meza nagusia izango da, Santa Agedako abesbatzarrekin; eta 13:00etan Vermouth dantza, Gardokirekin.

TELEFONO JAKINGARRIAK

OSASUNA / LARRIALDIK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Erzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zujiako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:10	20:25

OHARRA: izartxoaren orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deltu beharko dute honako zenbaki honetara: 629 54 59 23

OHARRAK

IKASGELA MUGIKORRA
Araba, gure ondarea izeneko kanpainako ikasgela mugikorra Arabako herri guztietan ibiliko da, herrialdeko ondarea erakusten. Hala, urriaren lehen eta 2an Bañera parkean izango da eta urriaren 3an Azkoagako parkean. Orduetgia honako hau da: 12:00etatik 14:00etara eta 16:00etatik 19:30era. Besteak beste, Arabako azpiegitura hidraulikoak, errepideak, eraikitako ondarea eta kartografia ezagutaraziko dute kanpaina horren bitartez.

ZINEMA
Oraingo astean *Operación Trueno* izeneko filma emango dute. Zapatuan izango da, kultura etxeko zinema aretoan, 22:00etan. Horren harira, gogora ezazue zapatukoa izango dela udako zinemaren azkeneko saioa. Arduradunek esan digutenez, urrian ez da zinema saiorik egongo, eta azaroan neguko zinema ematen hasiko dira; hain zuzen ere, filmak domeka arratsaldeetan emango dituzte.

Anbulatorioko zerbitzuak moduzuzenean zelan erabili

UBANE MADERA

Hirugarren urtez, ambulatioaren erabilera zuzena bultzatzeko kanpaina abiarazi du Arrasate-Aramaioko ambulatioak. Besteak beste, gogoratu gura dute lehen mailako atentzio zerbitzuetarako hitzordua hartu beharra dagoela alde zurretik.

Eta, txanda alde zurretik hartu beharrez gain, txanda hori goizez zein arratsaldean har daitekeela gogorarazi gura dute.

Anbulatorioko arduradun Edurne Marañonek adierazi digunez, kontua da txanda hartzeko erabiltzaileek goizez bakarrik deitzeko ohitura dutela. Horren ondorioz, dei larregi jasotzen dituzte goizean, eta telefona

saturatu egiten da.

Beraz, gogorarazi gura dute egun osoan dei daitekeela. Are gehiago, gomendatzen dute medikuarengana biharamunean joan barik bizpahiru egunera-edo joan behar izanez gero, txanda arratsaldean hartzea. Honako hau da erabili beharreko telefono zenbakia: 945 44 53 40.

Lehen mailako atentzioetan honako zerbitzuak sartzen dira: medikuntza orokorra, erizaina (froga osagarriak egiteko: elektrokardiogramak, espirometria eta analisiak), pediatria, emagina eta dentista.

MEDIKU ETA ERIZAIN BANA

Aramaioko ambulatioan mediku eta erizain bana daude zerbitzuak emateko. Hori bai, zenbait zerbitzu erabiltzeko Arrasateko ambulatioara joan beharra dago. Hala gertatzen da espirometria frogak egiteko, emaginarengana joateko eta dentistarengana joateko. Pediatrari dagokionez, astean behin bisitatzen du Aramaio. Edozelan ere, pediatrarako Arrasateko ambulatioara joateko aukera ere badago.



Zerbitzu batzuetarako, Arrasateko ambulatioara joan beharra dago.

BOTEPRONTOAN/ Mertxe Elortza · KZGuneko arduraduna

“Nahi baino jende gutxiago etortzen da KZGunera; jende gehiago etorri beharko litzatekeela uste dut”

Legazpikoa jaiotzez, bost urte daramatza Mertxe Elortzak Aramaion bizi izaten. Ingeniaritza Tekniko Informatikoko ikasketak ditu eginda, eta herriko KZGunea zabaldu zutenetik hango arduraduna da. Hori bai, laster utzi beharko du leku hori, haurdun dago-eta. Edozelan ere, bien bitartean, KZGunearen gainean jardun dugu:

Badirudi KZGuneak hartu duela nolabaiteko abiada, ala?

Nahi baino txikiagoa. Jende gehiago etorri beharko litzateke. Batez ere jende nagusia dator; 30 eta 55 urte arteko herritarrek oso gutxi etortzen dira. Eta horiek baino gazteagoak ikastaroetara etortzen dira, baina ez nabigatzen. Bakarrik egoten naiz...

Orain, hil bukaerara arte oinarritzko Internet ikasteko aukera dago, ezta?

Bai. Urtarrilera arte hori emango dugula uste dut. Izan ere, oraingoz etorri den jendeak ez daki zer den ordenagailu bat. Hortaz, ikastaroa hortik hasten da: ordenagailua zer den erakutsi, poliki-poliki, eta gero Internet erabiltzen ikasi. Ikastaroak 20 ordu ditu, eta norbaitek pentsatzen badu ez dela nahikoa izan, berriro egin



“Talde moduan irabazi asmorik gabeko web orriak egiteko aukera dago KZGunean”

dezake ikastaro bera.

Hortaz, jende nagusia etorri da orain arte; zein adinetakoa?

50 urtetik gorakoak. Bi lagun gazteago izan ditut, baina gehienak 50 urtetik gorakoak dira. 80 urteko ikasle bat eta guzti izan dit.

Eta holakoak zelan konpontzen dira?

Arazo handiena saguarekin izaten dute. Ez dute ondo erabiltzen. Klik egin behar dutenean ihes egiten die. Eta ito egiten dira, larritu. Sagua ahalik eta gutxien erabiltzeko bideak aurkitu behar izaten ditugu, hasieran, behintzat. Gero, denborarekin lortzen dute erabiltzea.

Zerk harritzen ditu gehien?

Harritu ezerk ere ez. Ilusioa dute. Ikasteko ilusioa. Adibidez, Interneten nabigatzen dutenean poztu egiten dira.

“Norbait gure ordutegira moldatu ezin ezean, ni moldatuko naiz haren ordutegira”

LABUR

Hobi septikoak garbituko dituzte laster

Aramaioko Udalak jakinarazi digunez, laster udal hobi septikoak garbitzen hasiko dira, eta horiekin batera, hobi septiko partikularrak ere garbituko dituzte. Hala, hobi septikoa garbitu gura duenak irailaren 30a baino lehen eman beharko du izena udal bulegoetan, eta hobia non dagoen esan.

Ikasliburuak erosteko dirulaguntzak

Hiru aste barru (urriaren 15ean) bukatuko da aurtengo ikasturterako liburuak erosteko dirulaguntzak eskatzeko epea. Haur Hezkuntzako bigarren zikloko eta Lehen Hezkuntzako eta DBHko edozein mailatan matrikulatuta dauden ikasleek eska ditzakete laguntzok. Eskariak Gasteizen egin behar dira, Samaniego kaleko 14. zenbakian.

Eta 80 urteko emakumea zelan ibili da?

Ba, adibidez, posta elektronikoa erabiltzen ikasi genuenean, ez zion jaramon handirik egin, eta nabigatzen ibili zen, bakar-bakarrik. Gustatzen zitzaizkion webguneak aurkitu zituen eta haietan ibili zen nabigatzen.

Ikastaroak egiteaz gain, zer gehiago egin daiteke Aramaioko KZGunean?

Nabigatu, posta elektronikoa erabili... Internetekin lotutako edozer. Hori bai, 18 urtetik gorakoak bakarrik etor daitezke. **Etorri gura duenak zer egin behar du?**

Udaletxean edo hemen bertan izena eman. Erabiltzaile pasahitza ematen zaio eta gero posta elektronikoko kontu bat, hura erabili gura badute.

Zer esango zenioke oraindik etortzera animatu ez den horri?

Argi izan behar dutena dela ikastaroa zero-zerotik hasten dela; inor ez dela gutxiago; etorri gero, seguru ikasiko dutela zerbait. Eta ikastaroen taldeak beti joaten direla azkenaren erritmora.

Bestelako herriekin konparatuz, Aramaion jende gutxi etortzen da?

Bai. Otxandion, adibidez, jende kopuru bikoitza dator.